



Kalaallit Nunaanni Inatsisartunut qinersisarneq pillugu Inatsisartut inatsisaata allangortinneqarnissaa pillugu Naalackersuisut UPA 2017-imut suliniuteqaqqullugit Inatsisartut aalajangiiffigisassaattut siunnersuut. Taamaaliornikkut inatsisartunut qinersinissaq tulleg nallertinnagu Avanersuup, Ittoqqortoormiit-Ilu immikkut inatsisartunut qinersiveqalernissaat qulakkeersinnaaqqullugu.

(Inatsisartunut ilaasortaq Anthon Frederiksen, Partii Naleraq)

Siullermik qujanaq siunnersuuteqartumut

Inatsisartuni pisussaaffigaarput nunarput tamaat sullissallugu, illoqarfiuppat, nunaqarfiuppalluunniit aamma isorliunerusut tamaasa. Taamaakkaluartoq siunnersuuteqartup oqariatuutaa paasilluarlugu imatut oqaaseqassuugut

Inuit Ataqatigiinni ukiorpassuannortuni tamat oqartussaanera nalilersortuagassatut oqariatuutigisarpaput.

1998-imili qinerseriaaseq allangortinneqarpoq qinersivik ataasiinnangorlugu.

Tamanna illoqarfinit tamanit sinniisoqarsinnaanermut killiliinikuuvoq, taamaattumik ullumimut innuttaasunit politikkerinillu nalilersornissaa pingaaruteqarluinnartutut Inuit Ataqatigiinniit isumaqarfigaarput

Sumiiffimmi qinigaatitaqarneq iluaqutaanera nalunngilluinnarparput piosoq, tassalu qanimut qinikkamik najuuttoqartarnera, qinikkammi pissutsinik piffinni ilisimasaqartuupput aaliagiinernullu assigiinngitsunut peqataatinneqarneri soorunami nammineq sumiiffigisamut sunniuteqarnissaa qulakkeerniartarnera qularutissaanani.

Inatsisartuni siunnersuut una ukiorpassuarni oqallisaasarsimavoq, Inuit Ataqatigiinnilu isumaqartuarpugut tamat oqartussaaqataaneq siammasinnerpaamik innuttaasunut atuutissasoq aammalu anguniartuurtarlugu tamanna atuuttunngornissaa.

Naalackersuisut.

Siornatigut assingusumik siunnersuuteqartarnerup isumaqatigineqartannginneri tunngavigalugit isumaqataanngillat uunga siunnersuummut, massakkut qinerseriaaseq ajoriffissaqartinnginnamikku.

Ukioq kingulleq ukioq aallartinnerani Suka K Frederiksen aamma Anders Olsen §37 suleriaaseq naapertorlugu apeqquteqaataanni soqutiginarluinnartoq ersarippoq paaserusunneqartoq tassaasoq Inatsisartuni ilaasortat sulinerminni saqqummiussaataq namminneq najugaqarfimminnut iluaqusernissaa siunertarineqartarnerisooq, taamatuttaaq illoqarfiit nunaqarfiillu sinniisuutitaqannginneq pequtaalluni ineriartornerannut annikinnerunersooq Naalackersuisut misissuivigineqarnikuunersut.

Naalackersuisullu akippat misissuisoqarsimanngittoq ilaasortat namminneq najukkaminnut iluaqutissamik siunnersuuteqartarnerisut.

Kommunenili Nunaqarfinnilu sinniisut sumiiffinni tamanit sinniisoqarneq piosoq erseqqissarneqarluni

Taamaattumik tamakku tunngavigalugit Inuit Ataqatigiinnut ersarilluarpoq qinerseriaaseq 1998-imili atuuttoq nalilersorluarneqarnissaa piffissanngorluinnartoq, qulakkeerniarusullugu innuttaasunut qinerseriaaseq ajunngitsumik atugaqartitsinnermut qulakkeerninnerisooq.

Siunnersuut pingaaruteqarmat itisilernerullugu misissugassatut Inatsisinut ataatsimiitsitaliamut ingerlateqqipparput.

Qujanaq